



Broj: 15-03-16-5-2408-18/17

Datum: 2.2.2018. godine

Na osnovu člana 61. Zakona o upravi (Službeni glasnik BiH broj 32/02, 102/09 i 72/17), člana 19. Zakona o Agenciji za identifikaciona dokumenta, evidenciju i razmjenu podataka BiH (Službeni glasnik BiH broj 56/08), člana 69. stav 2. tačka d) i člana 70. Zakona o javnim nabavkama BiH (Službeni glasnik BiH broj 39/14), direktor Agencije donosi sljedeću:

ODLUKU **o poništenju postupka nabavke**

I

Poništava se postupak javne nabavke pogonskog goriva za područje Federacije Bosne i Hercegovine-LOT 2 objavljen na web portalu Agencije za javne nabavke BiH, broj obavještenja: 1110-1-1-107-3-123/17 od 13.12.2017. godine, koji je proveden u skladu sa procedurom otvorenog postupka.

II

Ova odluka će se dostaviti ponuđačima u roku od 3 (tri) dana, a najkasnije u roku od 7 (sedam) dana od dana donošenja.

III

Ova odluka stupa na snagu danom donošenja.

O b r a z l o ž e n j e

Na osnovu provedenog postupka nabavke, Komisija za nabavke je konstatovala da je rok za dostavu ponuda 01.02.2018. godine do 10:00 sati, te da su do navedenog roka na protokol Agencije za identifikaciona dokumenta, evidenciju i razmjenu podataka Bosne i Hercegovine (u daljem tekstu: Agencija) pristigle 2 ponude i to ponuđača: HoldINA d.o.o. Sarajevo i HIFA d.o.o. Tešanj. Neblagovremenih ponuda nije bilo.

Komisija je predložila donošenje odluke o poništenju postupka nabavke, u skladu sa članom 69. stav 2. tačka d) Zakona o javnim nabavkama BiH, iz razloga što nijedna od primljenih ponuda nije prihvatljiva.



Ponuđač **HoldINA d.o.o. Sarajevo** nije kvalifikovan, odnosno njegova ponuda nije prihvatljiva iz razloga što:

- Izjava o ukupnom prometu i prometu u segmentu poslovanja za posljednje 3 finansijske godine nije ovjerena kod nadležnog organa na način kako je to traženo 6.4.1 b) tenderske dokumentacije;
- Nije dostavljen original certifikat o kvaliteti svih vrsta goriva iz predmeta nabavke koji je tražen tačkom 6.5.1 b) tenderske dokumentacije.

Ponuđač **HIFA d.o.o. Tešanj** nije kvalifikovan, odnosno njegova ponuda nije prihvatljiva iz razloga što:

- Izjava o ukupnom prometu i prometu u segmentu poslovanja za posljednje 3 finansijske godine nije ovjerena kod nadležnog organa na način kako je to traženo 6.4.1 b) tenderske dokumentacije;
- Nije dostavljen original certifikat o kvaliteti svih vrsta goriva iz predmeta nabavke koji je tražen tačkom 6.5.1 b) tenderske dokumentacije, nego je dostavljena ovjerena kopija istog, iako je tenderskom dokumentacijom izričito tražen original certifikat, a slanje ovjerene kopije istog omogućeno je samo za podugovarače.

Komisija je prema specifikaciji navedenoj u tenderskoj dokumentaciji, provedenom postupku analize i ocjene ponuda izradila Zapisnik o ocjeni ponuda, u kojem su detaljno obrazloženi razlozi za poništenje postupka nabavke.

Na osnovu prijedloga Komisije, odlučeno je kao u dispozitivu ove odluke.

Pouka o pravnom lijeku: Protiv ove odluke pravo žalbe ima svaki privredni subjekat koji ima ili je imao interes za dodjelu ugovora o javnoj nabavci i koji učini vjerovatnim da je u konkretnom postupku javne nabavke bila ili je mogla biti prouzrokovana šteta zbog postupanja ugovornog organa, a koje se u žalbi navodi kao povreda zakona i podzakonskih akata od strane ugovornog organa u postupku javne nabavke. Žalba se izjavljuje u roku od 10 (deset) dana od dana prijema ove odluke. Žalilac izjavljuje žalbu Uredu za razmatranje žalbi Bosne i Hercegovine putem ugovornog organa, u pisanoj formi direktno ili preporučenom poštanskom pošiljkom. Žalba se podnosi u dovoljnom broju primjeraka, a koji ne može biti manji od tri.



DIREKTOR

Dr. sc. Arif Nanić

Signed by: ANANIC

дигитално потписано / digitalno potpisano / digitally signed